ditte fabriche do epitaphii col nome suo suso, et poi andar a veder la fabricha di San Salvador nuova et li udir messa. *Tamen* non so quello farà, è vechio e di complexion debile; *tamen* in Colegio, Consejo di X e Pregadi non mancha mai.

Da poi disnar, fo Pregadi, et leto letere di Roma e di Napoli.

Di Palermo, di sier Pelegrin Venier qu. sier Domenego, di . . . Lujo. Qual manda li capitoli di l'acordo fece domino Hugo di Monchada capitano di l'armada dil Catholico re con Zerbi, e quel seicho si ha fato tributario di questa Maestà et darli ducati 6000, et si fazi una rocha, et si aspeti li mori è andati al Cayro et . . . . Scrive dita armata si parti, de la qual è restà dito don Hugo con . . . . galie.

Di Ragusi, dil Guidoto secretario, fo letere, et di Cataro e di Cypri, dil Locotenente, et dil Mosto capitanio di Famagosta. Il sumario di le nove di Cypro noterò qui avanti.

Fu leto una letera di sier Alvise da Mosto podestà di Lendenara, di 17 Lujo. Di do casi sequiti proditorii, di uno Jacomo di Bentin citadin de li morto da Alexandro Maladelo bolognese et Bernardin di Codignola, l'altro di Domenego di Balzan morto et di la mojer di Belin Borso ferita da Bortolo Falanela et Zaneto Malitrato dil borgo di le Casele con altri compagni 8 over 10. Fu posto, per i Consieri et sier Hironimo Paruta Cao di XL, darli autorità di proclamarli etc., meterli in bando di Venetia, terre e lochi, con taja vivi lire 500, morti lire 300, e li beni confiscadi: 145, 0, 0.

Fu posto, per li Consieri, Cai di di XL e Savii, suspender li debiti di sier Marco Donado qu. sier Donado debitor di la Signoria nostra per anni do proximi. Il qual ha passà 90 anni, è il più vechio di Venetia zentilhomo, *tamen* vien a Consejo et va per terra 4 volte al zorno a San Marco. Fu presa, ave 179, 3, 0.

Fu posto, per li Savii ai ordeni, confinar sier Francesco Pasqualigo capitanio di le galie per tutto di 3 in galia, soto pena *ut in parte*. Ave 176, 3, el qual ubidì.

Fu posto, per li Savii tutti, scriver al Provedador di l'armada che di tutte le galie è fuora, si armate qui come in Candia e altrove, tutte mandino a disarmar, et quelle di Candia, restando solo con 6 galie, le qual sono queste sotoscrite, tutto il resto debasi disarmar:

Sier Piero Gradenigo qu. sier Anzolo. Sier Daniel Contarini qu. sier Alvise. Sier Hironimo Lion qu. sier Pietro. Sier Filippo Baxadona qu. sier Alvise. Sier Nicolò Trivixan qu. sier Piero, Sier Bortolamio Falier qu. sier Lucha.

Et questo, perchè in le altre galie, parte è vechie e su parte è zurme di Terra ferma; sichè resta 7 galie fuora solamente per questa invernata! Fu presa, ave . . . . .

Fu posto, per li ditti, atento li avisi si ha: che di 1500 fanti sono in Cypro restar debi *solum* 700, et che 'l Luogotenente di Cypro e uno Consier vadi a Famagosta a far questa cassation, cassando quelli è maridati de lì etc. Fu presa.

Fu posto, per li diti, che di fanti provisionati 150 è a Corphù, restar debi *solum* 100 sotto quelli do contestabeli, et 20 per cadaun di casteli *ut in parte* Fu presa.

Fu posto, per li ditti, che li danari mandati in Candia per armar, che è ducati 3000, e poi fu suspeso, li ditti danari siano deputati a la fabricha di quella terra, et sia scritto in Candia a domino Gabriel da Martinengo, voy instruir quelli popoli etc. ut in parte. Fu presa.

Fu posto per . . . . che alcuni . . . . quali . . . . . hanno ducati 6 per paga . . . . . .

Fu posto, per i Consieri e Cai di XL: che sia comesso a sier Polo Loredan capitano di Cadore, possi spender ducati 50 di danari aspetanti a la Signoria nostra in la fabricha di quel castelo: 177, 2.

Fu posto, per li Savii loro, che li creditori di le Cazude, in termene de uno mexe, debano aver tolto i debitori, e passando, li debitori restino per conto di la Signoria nostra, *ut in parte*. Ave 139 di si, 47 di no. Fu presa.

Fu posto, per li Savii, certa confirmation di uno 57° privilegio di la Signoria, fato dil 1454 a di 24 Dezembrio al comun e homeni di Val Scal..., sichè sia come 1509: avè 143, 7, 6.

Fu posto, per li Savii dil Consejo et li Savii di Terra ferma, una parte: cum sit che si ritrova 4 botege in Rialto nuovo, quelle siano vendute a l'incanto a danari dil Monte Nuovo, con questo li Prove dadori sopra il Monte Nuovo dagi ducati 800 per il fabricar di Rialto. E il Contarini e Trevixan vol compir di sora la stajera et il Venier vol compir il portego di Visentini; et sopra questo sier Moisè Venier preditto andò in renga e disse la soa opinion, et li rispose sier Francesco Bragadin savio dil Consejo, dicendo, fazendo sora la stajera, si sparagna officii che si paga in volte ducati 200. Hor il Venier nulla messe, et andò la parte et fu presa, ave 11 di no, 176 di si.